



Tužilaštvo - Tužiteljstvo Bosne i Hercegovine
Тужилаштво Босне и Херцеговине

Broj: T20 0 KTO 0023252 23
Sarajevo, 15.01.2026. godine

SUD BOSNE I HERCEGOVINE
- Sudiji za prethodno saslušanje -

Na osnovu odredbi člana 35. stav (2) tačka i) i odredbi člana 226. stav (1), u vezi sa odredbama člana 227. Zakona o krivičnom postupku Bosne i Hercegovine (u daljem tekstu: ZKP BiH),
podizemo:

OPTUŽNICU

PROTIV:

1. **ALEKSANDAR KOJIĆ**, zvani „Aco“, rođen 1993. godine, državljanin Bosne i Hercegovine,
2. **MLADEN TODOROVIĆ**, zvani „Arkan“, rođen 1990. godine, u Tuzli, državljanin Bosne i Hercegovine,
3. **RASTKO BOŠNJAK**, rođen 1998. godine, u Bijeljini, državljanin Bosne i Hercegovine,
4. **DRAGANA RISTIĆ**, rođena 1995. godine, u Bijeljini, državljanka Bosne i Hercegovine i R. Srbije,
5. **MIHAJLO ĐORĐIĆ**, rođen 2004. godine, u Bijeljini, državljanin Bosne i Hercegovine.

ŠTO SU:

U vremenskom periodu od početka 2023. godine do početka 2024. godine, na teritoriji Bosne i Hercegovine, R Srbije, R Austrije, SR Njemačke i drugih zemalja, svjesni da se radi o opojnoj drogi, kao i da nemaju odobrenje nadležnog organa za nabavku, kupovinu, držanje i prodaju opojne droge „Cannabis Sativa L“, „Heroin“, „Kokain“, a koje se nalazi na Listi opojnih droga psihotropnih materija i biljaka iz kojih se može dobiti opojna droga i prekursora, suprotno Zakonu o sprečavanju i suzbijanju zloupotrebe opojnih droga („Sl. glasnik Bosne i Hercegovine“ br: 08/06, 103/08, 51/11), Konvenciji o psihopatskim supstancama iz 1971. godine i Konvenciji UN protiv nezakonitog prometa opojnih droga i psihotropnih supstanci iz 1988. godine, čiji je promet zabranjen i može se obavljati samo na osnovu dozvole nadležnog organa izdate na osnovu Zakona o sprečavanju i suzbijanju zloupotreba opojnih droga Bosne i Hercegovine, koju dozvolu nisu imali, pa iako svjesni zabranjenosti radnji prometa ovim opojnim drogama i svjesni svog djelovanja, htijući to, u zajedničkoj namjeri sticanja protivpravne imovinske koristi, **Mladen Todorović**, „(...)“ i **Aleksandar Kojić**, organizovali grupu za organizovani kriminal, u

smislu člana 1. stav (22) Krivičnog zakona Bosne i Hercegovine, koja je djelovala sporazumno s ciljem izvršenja krivičnih djela „Neovlaštenog prometa opojnim drogama“ iz člana 195. stav 1. Krivičnog zakona Bosne i Hercegovine, na način da su kao organizatori grupe u naznačenom vremenskom periodu, međusobnim povezivanjem, kao i povezivanjem sa pripadnicima drugih kriminalnih grupa koje su s ciljem neovlaštenog prometa opojnim drogama djelovale na teritoriji Bosne i Hercegovine, R Srbije, R Austrije i SR Njemačke, kupovali veće količine opisane opojne droge, po cijenama zavisno od kvalitete opojne droge, i to: „Cannabis Sativa L” za kupovnu cijenu od najmanje 900,00 do 1.300,00 EUR-a po jednom kilogramu (u protuvrijednosti od 1.755,00 do 2.535,00 KM); „Kokain” od najmanje 27.000,00 do 31.000,00 Eura po jednom kilogramu (u protuvrijednosti od 52.650,00 do 60.450,00 KM) i „Heroin“ od najmanje 8.000,00 – 12.000,00 EUR po jednom kilogramu (u protuvrijednosti od 15.600,00 do 23.400,00 KM) organizovali prevoze ili prenose iste preko međudržavnih granica, pronalazili stanove i druge lokacije za skrivanje i držanje opojne droge, te razvili mrežu preprodavaca ove opojne droge, koji su istu u različitim količinama po višim cijenama od kupovne, zavisno od kvalitete opojnu drogu i mjesta prodaje prodavali kupcima i pripadnicima drugih kriminalnih grupa, među kojima lice „(...)“ u R Austriji, a kojom Grupom su „(...)“ i Aleksandar Kojić rukovodili iz Bosne i Hercegovine, Mladen Todorović iz R Srbije i R Austrije, i to s podjeljenim ulogama u organizaciji i rukovođenju, i to: **Mladen Todorović** u organizovanju nabavke veće količine opojne droge na teritoriji R Srbije, njenog prevoza na teritorij R Austrije i SR Njemačke, prevoza ili prenošenja na teritorij Bosne i Hercegovine; „(...)“ prevoza opojne droge na teritorij R Austrije i SR Njemačke, pronalaska i iznajmljivanja stanova za skrivanje opojne droge radi dalje prodaje, te njenom držanju u gradu Beču i Innsbrucku – R Austija, kao i Regensburgu i drugim gradovima na teritoriji SR Njemačke, te formiranju mreže preprodavaca opojne droge na teritoriji Austrije i Bosne i Hercegovine i **Aleksandar Kojić** prevoza, prenosa i preuzimanju ove opojne droge, njenog skrivanja i držanja na teritoriji Bosne i Hercegovine, te razvijanja mreže preprodavaca iste na području opštine Bijeljina i šire, čiji pripadnici su na teritoriji R Austrije postali: „{...}“; a od jula mjeseca 2023. godine **Mihajlo Đorđić** i druga njima poznata lica, koji su po angažmanu organizatora iz Bosne i Hercegovine odlazili na područje grada Beča u R Austriji, gdje su boravili u vremenskim intervalima od po 15 do 30 dana, te slijedeći upute organizatora iz tzv „štekova“ koji su se nalazili u prethodno iznajmljenim stanovima preuzimali opojnu drogu „Kokain“ i „Heroin“, te istu dalje u većim ili manjim količinama, prodavali kupcima, a na teritoriji Bosne i Hercegovine: **Rastko Bošnjak**, **Dragana Ristić** i druga njima poznata lica, koji su po uputama organizatora preuzimali opojnu drogu, koja je prethodno kupljena u R Srbiji, potom u putničkim motornim vozilima prevezena na teritorij Bosne i Hercegovine, do područja grada Bijeljine, gdje su Rastko Bošnjak i organizatori istu skrivali, prepakivali i zajedno sa Draganom Ristić preprodavali kupcima na području grada Bijeljine i šire, pa je svaki od njih imao svijest i znanje o određenim zadacima i radnjama izvršenja drugih, da bi u prilikama preduzimanja radnji izvršenja krivičnih djela međusobno komunicirali u grupnim ili pojedinačnim komunikacijama i putem telefonskih aparata na kojima su instalirane aplikacije „Signal“, „Telegram“, „Whatsapp“ i „Threema“, čime su organizatori Grupe stekli protivpravnu imovinsku korist u iznosu od najmanje 112.570,00 Eura (protuvrijednost 219.511,50 KM), a koji su shodno podijeljenim ulogama i zadacima, dijelili između sebe, pa su u najmanje opisanim slučajevima:

1.1. Aleksandar Kojić, Mladen Todorović i „(...)“ – zajedno sa drugim njima poznatim licima;

U vremenskom periodu od 13.05.2023. do 29.05.2023. godine, na teritoriji R Austrije, grad Beč, a po prethodnom dogovoru sa Aleksandrom Kojićem i Mladenom Todorovićem, „(...)“ neovlašteno prometovao količinom od najmanje 15 kg opojne droge „Cannabis Sativa L“, na način da je po prevozu ove opojne droge na teritorij R Austrije, posredstvom lica „(...)“ ostvario kontakte sa pripadnicima povezane kriminalne grupe koja je djelovala u R Austriji, te radi dalje prodaje dogovorio kupoprodaju iste za iznos od najmanje 31.200,00 EUR-a, nakon čega je njemu poznat pripadnik Grupe, slijedeći upute koje mu je dao, dana 13.05.2023.godine, na području grada Beča kupcima predao istu, a potom u dva navrata preuzeo novac od prodaje iste, i to dana 22.05.2023. godine iznos od 24.200,00 Eura i dana 29.05.2023. godine iznos od 7.000,00 Eura, čime su pribavili protivpravnu imovinsku korist u ukupnom iznosu od 11.700,00 Eura;

1.2. Mladen Todorović zvani „Arkan“, Aleksandar Kojić i „(...)“ zajedno sa drugim njima poznatim licima;

U vremenskom periodu od 02.11.2023. do 25.11.2023. godine, novčanim sredstvima koja su udružili zajedno sa licem „(...)“ **Mladen Todorović** na teritoriji Srbije od njemu poznatih pripadnika povezne kriminalne grupe kupio najmanje 40 kg opojne droge „Cannabis Sativa L“, koju su po njegovim uputama njemu poznati pripadnici grupe iz R Srbije u vremenskom periodu od 20.11.2023. do 25.11.2023. godine prevezli sa teritorije R Srbije na teritorij R Austrije i SR Njemačke, za koje vrijeme su „(...)“ i **Aleksandar Kojić**, zajedno sa licem „(...)“ u ostvarenim kontaktima sa njima poznatim pripadnicima kriminalnih grupa koje su djelovale u ovim zemljama dogovorili prodaju ove opojne za iznos od najmanje 3.100,00 Eura po jednom kilogramu, dana 20.11.2023. godine istu u količini od najmanje 25 kg njima poznati pripadnici Grupe predali kupcima u mjestu Regensburg, SR Njemačka, dok su dana 25.11.2023. godine količinu od najmanje 15 kg predali kupcima u mjestu Insburck, R Austrija, čime su pribavili protivpravnu imovinsku korist u ukupnom iznosu od 72.000,00 Eura;

1.3. Mladen Todorović zvani „Arkan“, Aleksandar Kojić, „(...)“ zajedno sa drugim njima poznatim licima;

U vremenskom periodu od 19.11.2023. do 06.01.2024. godine, na teritoriji R Austrije, grad Beč, neovlašteno prometovali najmanje 1,83 kg opojne droge „Kokain“, na način da su na osnovu prethodnog ostvarenog kontakta sa licem po nadimku „(...)“ u prilikama kada je isti putem mobilne aplikacije ... obavjestio „(...)“ i **Aleksandra Kojića** o potrebnim količinama opojne droge „Kokain“ za dalju preprodaju iste, **Mladen Todorović** davao upute njemu poznatim pripadnicima Grupe koji su u to vrijeme boravili i djelovali u mreži preprodavaca na području grada Beča, a koji su opojnu drogu u dogovorenim količinama i lokacijama primopredaje prodavali licu „(...)“, i to dana 19.11.2023. neutvrđenu količinu, 22.11.2023. količinu od 05 grama, 26.11.2023. količinu od 120 grama, 15.12.2023. količinu od 110 grama, 25.12.2023. količinu od 500 grama, 30.12.2023. količinu od 400 grama i 06.01.2024. godine količinu od 700 grama opojne droge „Kokain“, za iznose od najmanje 50 Eura po jednom gramu, čime su pribavili protivpravnu imovinsku korist u ukupnom iznosu od 34.770,00 Eura;

1.4. Aleksandar Kojić, Mladen Todorović i „(...)“ - zajedno sa drugim njima poznatim licem;

U vremenskom periodu od 28.12.2023. do 09.01.2024. godine, na teritoriji R Austrije u gradu Beču, a po prethodnom dogovoru sa Aleksandrom Kojićem i Mladenom Todorovićem, radi dalje preprodaje opojne droge „Kokain“, nakon što je „(...)“ stupio u kontakt sa njemu poznatim licem „(...)“, te sa istim dogovorio kupoprodaju 1,5 kilograma ove opojne droge, angažovao pripadnika grupe po nadimku „(...)“, koji je slijedeći njegove upute, dana 08.01.2024. godine, na adresi ..., licu „(...)“ prodao najmanje 800 grama opojne droge „Kokain“, za iznos od 19.600 Eura, da bi dana 09.01.2024. godine, na adresi ... Beč, R Austrija istom licu prodao najmanje 700 grama, za iznos od 15.500 Eura, čime su pribavili protivpravnu imovinsku korist u ukupnom iznosu od 4.100,00 Eura;

1.5. Mladen Todorović zvan „Arkan“, Aleksandar Kojić, „(...)“ i Mihajlo Đorđić – zajedno sa drugim njima poznatim licima;

U vremenskom periodu od jula do oktobar 2023. godine, teritoriji R Austrije, grad Beč, neovlašteno prometovali tačno neutvrđenom količinom opojne droge „Cannabis Sativa L“, „Kokain“ i „Heroin“, a najmanje 2 kg opojne droge „Heroin“ i 2 kg opojne droge „Kokain“, na način da su na osnovu prethodnog ostvarenog dogovora između Mladena Todorovića zvan „Arkan“, „(...)“, Aleksandra Kojića i drugih njima poznatih lica pripadnika povezane kriminalne grupe koja je djelovala na teritoriju R Austrije i drugih država, angažovali „{...}“, **Mihajla Đorđića**, „{...}“ i druga njima poznata lica, za prodaju opojne droge na području grada Beča u R Austriji, koja je prethodno na neovlašteno prometovana u R Austriju na njima poznat način preuzimali opojnu drogu „Kokain“ i „Heroin“ na adresama ... i drugim lokacijama i dalje prodavali u količinama od 100 do 350 grama po jednom danu, za njima poznate iznose novca po jednom gramu, za koje su dobijali iznos od najmanje 03 Eura po jednom prodatom gramu, koje su dalje međusobno dijelili, pa je tako, na teritoriju R Austrije, na području grada Beča, dana ... 2023. godine prilikom pretresa pripadnika „(...)“ pronađeno i privremeno oduzeto od „(...)“ 218,2 grama opojne droge „Heroin“, a dana ... 2023 godine pronađeno i privremeno oduzeto od „(...)“, 59 grama opojne droge „Kokain“ i 584 grama opojne droge „Heroin“, čime su od prodaje opojne droge pribavili protivpravnu imovinsku korist u njima poznatom iznosu;

1.6. Aleksandar Kojić, Mladen Todorović i Dragana Ristić – zajedno sa drugim njima poznatim licima;

Dana 30.11.2023. godine Aleksandar Kojić i Dragana Ristić, na teritoriji Bosne i Hercegovine i R Srbije, neovlašteno prometovali tačno neutvrđenom količinom opojne droge „Kokain“, i to na način da su, opojnu drogu „Kokain“ koju je prethodno za neutvrđeni iznos novca nabavio **Mladen Todorović**, dana 30.11.2023. godine, **Aleksandar Kojić i Dragana Ristić**, sa vozilom BMW registarskih oznaka ..., koje je u stvarnom vlasništvu Aleksandra Kojića, preuzeli na teritoriju R Srbije, upakovanu u jedan komad, koju su dalje smjestili i sakrili u prostoru vozila BMW registarskih oznaka ..., a zatim dalje preuzetu opojnu drogu dana 30.11.2023. godine oko 13.52 sati prenijeli preko državne granice iz R Srbije u Bosnu i Hercegovinu, preko graničnog prelaza Rača, zatim smjestili i držali na njima poznatim lokacijama, među kojima i na adresi ... u Bijeljini, a sve radi dalje prodaje korisnicima opojne droge na području Bijeljine, čime su pribavili protivpravnu imovinsku korist u njima poznatom iznosu;

1.7. Mladen Todorović zvan „Arkan“ i „(...)“ – zajedno sa drugim njima poznatim licima;

Dana 11.01.2024. godine, na teritoriji R Austrije, grad Beč, neovlašteno prometovali najmanje 1,4 kg opojne droge „Cannabis Sativa L“, na način da su ostvarili kontakt sa njima poznatim pripadnikom povezane kriminalne grupe koja je djelovala u R Austriji, nakon čega je njima poznat pripadnik Grupe, slijedeći upute koje su mu dali, dana 11.01.2024. godine, na lokaciji ..., u gradu Beču predao dogovorenu količinu opojne droge, čime su pribavili protivpravnu imovinsku korist u njima poznatom iznosu;

1.8. Aleksandar Kojić, Rastko Bošnjak i Dragana Ristić – zajedno sa drugim njima poznatim licima;

U vremenskom periodu od 26.10.2023. do 11.01.2024. godine, na teritoriji Bosne i Hercegovine, na području grada Bijeljina, neovlašteno prometovali tačno neutvrđenom količinom opojne droge „Kokain“ i „Cannabis Sativa L“ i to na način da su, na osnovu prethodnog ostvarenog dogovora, nabavljenu i kupljenu opojnu drogu “Kokain” koju su u sastavu Grupe nezakonito prevezli ili prenijeli iz R Srbije u Bosnu i Hercegovinu, neovlašteno držali i skrivali na njima poznatim lokacijama na području grada Bijeljina, među kojima i na lokaciji na adresi ..., u kući i pratećim objektima koje je koristio Aleksandar Kojić, gdje su Aleksandar Kojić i pripadnik Rastko Bošnjak opojnu drogu “Kokain” miješali sa određenim smjesama, sve kako bi uvećali njenu količinu, te prepakivali u paketiće za njenu dalju uličnu prodaju, te istu svakodnevno prodavali i nudili na prodaju krajnji korisnicima – konzumentima, u količinama od 1 (jednog) grama (komad) za iznos od najmanje 100 KM za opojnu drogu “Kokain”, tako što bi konzumenti prethodno telefonski ili neposredno kontaktirali suorganizatore ili pripadnika Rastka Bošnjaka, u koji prilikama su dogovarali cijenu kupoprodaje, vrijeme, mjesto i način primopredaje opojne droge, a potom Aleksandar Kojić, Rastko Bošnjak i Dragana Ristić putničkim motornim vozilima i to BMW registarskih oznaka ..., Ford tip “Fiesta” reg. oznaka ... i Audi tip A3 reg.oznaka ... odlazili na lokacije gdje su istu držali i skrivali, preuzimali dogovorene količine opojne droge, a zatim se odvozili na dogovorena mjesta primopredaje, gdje su konzumentima, među kojima lica “{...}” i drugima, davali dogovorene količine opojne droge i preuzimali novac za kupovinu iste, da bi dana 12.01.2024. godine u ul. ..., radi dalje prodaje držali 819. grama opojne droge “Cannabis Sativa L” i 32. grama opojne droge “Kokain”, te drugu opremu za pakovanje i uvećanje količine;

1.9. Aleksandar Kojić, “(...)” – zajedno sa njima poznatim licima

U vremenskom periodu od mjeseca novembra 2023. do 11.01.2024. godine, zajedno sa licem „{...}“ kao organizatori Grupe međusobnim povezivanjem i dogovaranjem pripremali neovlašteni uzgoj i proizvodnju opojne droge “Cannabis Sativa L”, na način da su na osnovu međusobno zajedničkog ostvarenog dogovora nabavili opremu, i to lampe, elektroinstalacije, zemljište, saksije i drugu opremu, te dogovarali nabavku tačno određenih vrste sjemenki, koju su namjeravali koristiti za uzgoj i proizvodnju opojne droge „Cannabis Sativa L“ i staviti u funkciju u dijelu poslovnih prostorija koje je koristilo pravno lice „(...)“, na području grada Bijeljina, u ul. ..., na lokaciji tzv. ..., a sve kako bi i ovu proizvedenu opojnu drogu u sastavu Grupe dalje nezakonito prodavali na području Bijeljine ili su istu namjeravali neovlašteno prometovati u inostranstvu, od čega je dio opreme pronađen i privremeno oduzet dana 12.01.2024. godine, prilikom pretresa prostorija na adresi ... u Bijeljini, čiji je vlasnik, te korisnik Aleksandar Kojić;

2. Aleksandar Kojić;

U vremenskom periodu od sredine 2023. godine do januara 2024. godine, dio novca za koji je znao da je stečen izvršenjem krivičnog djela "Neovlešten promet opojnim drogama" iz člana 195. KZ BiH, svjestan da ulaganjem u legalne novčane tokove prikriva način sticanja pomenutog novca, što je i htio, pa je dio novca stečenog uslijed izvršenja pomenutog krivičnog djela i to novac u iznosu od najmanje 35.000,00 KM uložio u kupovinu putničkih motornih vozila BMW, tip G5L, model 520D, godina proizvodnje 2018., broj šasije ..., registarskih oznaka ... i vozilo Ford, TIP jd3, MODEL Fiesta, godina proizvodnje 2008., broj šasije ..., registarskih oznaka ..., čije plaćanje je izvršio gotovinom, a koja vozila je radi prikrivanja stvarnog porijekla i vlasništva, fiktivno upisao na ime „(...)“;

3. Aleksandar Kojić;

U dužem vremenskom periodu, Aleksandar Kojić, suprotno članu 7., 8. i 11. Zakonu o oružju i municiji Republike Srpske („Službeni glasnik Republike Srpske“, broj: 26/2016, 18/2017, 58/2019 i 86/2024), svjestan da nije mogao nabaviti i držati ili da je za nabavku i držanje morao imati dozvolu nadležnog organa, na njemu poznat način nabavio i držao minsko-eksplozivna sredstva i automatsko oružje, kao zabranjeno oružje, i to: 02 (dva) upaljača protivpješadijske mine antimagnetni hemijski (UPMAH 2); 03 (tri) detonatorske kapisle sa aluminijskim tijelom dužine 46mm i prečnika 7mm; (02) dva sporogoreća štapina, crne boje, dužine 72 cm i 984 cm; 03 (tri) protivpješadijske antimagnetne mine 2 (PMA-2); 03 (tri) trotilska metka (eksplozivni metak), ukupne težine 445 grama; 01 (jedno) eksplozivno punjenje za protivpješadijsku minu antimagnetnu – 2, težine 50 grama; 02 (dva) trotilska metka, težine 100 grama; 02 (dva) ručna bacača raketa M80, kalibra 64mm i 01 (jedna) automatsku pušku PPŠ 41 (Ruski špagin), kalibra 7.62 mm, fabričkog broja 5246 (automatsko vatreno oružje), sa pripadajućim okvirom, te na njemu poznat način nabavio i držao bez odobrenja nadležnog organa i to: 45 komada municije cal. 38 specijal za poluatomatsko oružje; 40 komada municije kalibra 7,62x39 mm za polutomatsko i automatsko oružje i 765 komada municije cal. 7.65x54 mm R za automatsko oružje, a koje su policijski službenici Ministarstva unutrašnjih poslova Republike Srpske pronašli i privremeno oduzeli prilikom pretresa objekata, u Bijeljini, na adresi ..., čiji je vlasnik, te korisnik Aleksandar Kojić;

Dakle, Aleksandar Kojić i Mladen Todorović pod tačkom 1. Organizovali i rukovodili grupom za organizovani kriminal koja je zajedničkim djelovanjem učinila krivično djelo Neovlašteni promet opojnim drogama iz člana 195. Krivičnog zakona Bosne i Hercegovine, **Aleksandar Kojić** pod tačkom 2. novac, koji je pribavio počinjenjem krivičnog djela, iskoristio u poslovanju – kupoprodaji vozila i prikrivao njegovu prirodu, izvor, raspolaganje, kretanje i vlasništvo, a takav novac ili imovinska korist su pribavljeni počinjenjem krivičnog djela propisanim Krivičnim zakonom Bosne i Hercegovine, **Aleksandar Kojić** pod tačkom 3. Neovlašteno držao vatreno oružje i eksplozivne materije, čije držanje građanima uopšte nije dozvoljeno;

Rastko Bošnjak, Dragana Ristić i Mihajlo Đorđić pod tačkom 1. kao pripadnici grupe za organizovani kriminal počinili krivično djelo propisano zakonom Bosne i Hercegovine za koje se može izreći kazna zatvora pet godina ili teža kazna.

Čime bi počinili krivična djela:

1. **Aleksandar Kojić**, tačkom 1. krivično djelo Organizovani kriminal iz člana 250. stav 3. Krivičnog zakona Bosne i Hercegovine (KZ BiH), u vezi sa krivičnim djelom Neovlašteni promet opojnim drogama iz člana 195. stav 1. KZ BiH; tačkom 2. krivično djelo Pranje novca iz člana 209. stav 2. u vezi stavom 1. KZ BiH; tačkom 3. krivično djelo Nedozvoljena proizvodnja i promet oružja ili eksplozivnih materija iz člana 361. stav 2. Krivičnog zakona Republike Srpske, a sve u vezi sa članom 53. KZ BiH;
2. **Mladen Todorović**, tačkom 1. krivično djelo Organizovani kriminal iz člana 250. stav 3. Krivičnog zakona Bosne i Hercegovine (KZ BiH), u vezi sa krivičnim djelom Neovlašteni promet opojnim drogama iz člana 195. stav 1. KZ BiH;
3. **Rastko Bošnjak**, tačkom 1. krivično djelo Organizovani kriminal iz člana 250. stav 2. Krivičnog zakona Bosne i Hercegovine (KZ BiH), u vezi sa krivičnim djelom Neovlašteni promet opojnim drogama iz člana 195. stav 1. KZ BiH;
4. **Dragana Ristić**, tačkom 1. krivično djelo Organizovani kriminal iz člana 250. stav 2. Krivičnog zakona Bosne i Hercegovine (KZ BiH), u vezi sa krivičnim djelom Neovlašteni promet opojnim drogama iz člana 195. stav 1. KZ BiH;
5. **Mihajlo Đorđić**, tačkom 1. krivično djelo Organizovani kriminal iz člana 250. stav 2. Krivičnog zakona Bosne i Hercegovine (KZ BiH), u vezi sa krivičnim djelom Neovlašteni promet opojnim drogama iz člana 195. stav 1. KZ BiH.

T U Ž I L A C
TUŽILAŠTVA BOSNE I HERCEGOVINE

T U Ž I L A C
TUŽILAŠTVA BOSNE I HERCEGOVINE